

脫生死。以是恩念，昊天難報。是故我語阿難：左肩擔父，右肩擔母，繞須彌山百千萬匝，血流沒踝，尚不能報一日乳哺之恩，豈應惡念，輕生悲語。

須摩提長者經

佛告大眾：若人違逆，不順父母，不行正法，不敬沙門梵志及諸耆宿，如是之人亦名爲死。

增壹阿含經

世尊告諸比丘：有二法與凡夫人，得大功德，成大果報，得甘露味，至無爲處。云何爲二法？供養父母，是謂二人獲大功德，成大果報。若復供養一生補處菩薩，獲大功德，得大果報，是謂比丘施此二人，獲大功德，受大果報，得甘露味，至無爲處。是故諸比丘常念孝順供養父母，如是諸比丘當作是學。

如來出現世時，必當爲五事，云何爲五？一者，當轉法輪。二者，當度父母。三者，無信之人立於信地。四者，未發菩薩意使發菩薩心。五者，當授將來佛決。若如來出現世時，當爲此五事。

若有眾生知返復者，此人可敬。小恩尙不忘，何況大恩。設離此間百千由旬，猶近我不異，我恆歎譽。若有眾生不知返復者，大恩尙不憶，何況小者。彼非近我，我不近彼。正使著僧伽黎，在吾左右，此人猶遠，是故比丘當念返復，莫學無返復。

告諸比丘：教二人作善，不可得報恩。云何爲二？所謂父母也。若復比丘，有人以父著左肩上，以母著右肩上，至千萬歲，衣被、飲食、床座臥具、病瘦醫藥，即於肩上放屎尿，猶不能得報恩。比丘當知父母恩重，抱之、育之，隨時將護，不失時節，得見日月。以此方便，知此恩難報，是故諸比丘當供養父母，常常孝順，不失時節。

佛告阿難、難陀、羅雲：汝等聳大愛道身，我當躬自供養。是時釋提桓因及諸天、天王前白佛言：唯願世尊勿自勞神，我等自當供養。舍利弗告諸天：止止，

此是如來所應修行，非是天龍鬼神所及也。所以然者，父母生子，多有所益，長養恩重，乳哺懷抱，要當報恩，不得不報恩。

賢愚因緣經

佛語阿難：出家在家，慈心孝順，供養父母，計其功德，殊勝難量。所以者何？我自憶念過去世時，慈心孝順，供養父母，乃至身肉濟救父母危急之厄，以是功德，上爲天帝，下爲聖主，乃至成佛，三界特尊，皆由斯福。

目連問五百輕重經

問：比丘教白衣不祭一切亡人，爲是理不？答：非。假使父母不食，敬心供養，亦得其福。問：人出家，王法父母不聽，爲得戒不？答：不得。